

Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqutariinnut iluaqutaasumik siusissukkut iliuseqartarnissamik Naalakkersuisut pilersarusioqqullugit peqquneqarnissannik Inatsisartut aalajangiiffigisassaattut siunnersuut. Pilersarusiaq juli 2022 naatinnagu Inatsisartunut saqqummiunneqassaaq.

(Inatsisartuni ilaasortaq Jess Svane, Siumut)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Aappassaaneerneqarnera

Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqutariinni pitsaaliuineramik suliaqarnissamut Naalakkersuisut suliaqaqqullugit Inatsisartut aalajangiiffigisassaattut siunnersuummut atatillugu peqqissaartumik suliaqarsimaneranut Ilaqutariinnermut Peqqissutsimullu Ataatsimiititaliaq Naalakkersuisut qutsavigaat.

Ataatsimiititaliap isumaqatigiissup allannguutissatut siunnersuut akuersaarmagu aamma piffissaliussaq taaneqartoq isumaliutissiissummi uppernarsarmagu, Naalakkersuisut nuannaarutigaa. Iliusissanut pilersaarut UKA 2022-p ingerlanerani agguanneqartussanngorlugu piariissaaq. Iliusissanut pilersaarutip ineriartortinnissaanut piffissaliussaq piviusorsiorpoq, piffissaliussarlu suliami suleqataasussanik attuumassuteqartunik ilaatitsinissamut nutserisitsinissanullu ikorfartuissaaq.

Taama oqaaseqarlutik siunnersuut aappassaaneerneqarnissaannut Naalakkersuisut tunniuppaat.